


ORATIO
IN FUNERE
CLEMENTIS XIII.
PONTIFICIS MAXIMI
HABITA
IN BASILICA VATICANA
XVI. KAL. MART. MDCCCLXIX.
AD SACRUM
EMINENTISSIMORUM CARDINALIUM
COLLEGIUM.
A BENEDICTO STAY.




ROMÆ MDCCXIX.
EX TYPOGRAPHIA OCTAVII PUCCINELLI
AD SANCTUM THOMAM IN PARIONE.

Superiorum Permissu.

REIMPRIMATUR.

Si videbitur Reverendis. Patri Sacri Palatii Apostolici Magistro.

Dominicus Patriarch. Antioch. Vicesg.




REIMPRIMATUR.

Fr. Thomas Augustinus Ricchini Ordinis Prædicatorum Sacri Palatii Apostolici Magister.



O R A T I O .



I præclare gestas esse respublicas arbitramur EE. PP. cum iisdem, quibus institutæ sunt, reguntur artibus; nulla profecto in maximo hoc religionis moderando imperio illustrior laus esse debet, quam si omnis illius administrandi ratio ad eam normam dirigatur, qua ab ipso Auctore ac Conditore Deo idem constitutum ac stabilitum fuisse scimus. Qui cum omnem illius vim ac universam legum comprehensionem vitæ sanctitate innocentia ac integritate morum contineri voluerit, quid præstabilius, quid laude atque admiratione

nostra dignius in iis esse potest, qui Sacrorum Duces ac Principes huic rerum summae atque æterno Sacerdotio regendo præsumunt, quam si cujus nobis dignitatem potestatemque referunt, ejusdem sanctitatem etiam exprimant, atque his ab illo divinitatis tanquam impressis vestigiis insistant? Quare merito florentissima ea religionis tempora fuisse memorantur, quæ hujusmodi Pontificum sanctitate maxime illustrata extiterunt. Nos ipsi huic nostræ ætati gratulari, necque divino præsertim beneficio obstrictos fateri debemus, qui hujus excellentis virtutis exemplar in CLEMENTE XIII. renovatum nobisque propositum vidimus. Nam si ex cujusque institutis atque adæ vitæ genere tanquam ex oris lineamentis forma quædam exoriri solet, quæ nobis ut alieni vultus similitudinem, sic imaginem animorum referat, CLEMENTIS vitam omnem memoria repetenti, quid aliud occurrit atque obicitur animo, quam quædam morum atque actionum ratio ad veræ absolutæque virtutis pulchritudinem conformata? Sed extinctum jam singulare hoc sanctitatis lumen, nobisque repente sublatum atque ereptum intuemur. Quod mœrentibus atque afflictis in luctu ac dolore jucundissimum esse solet, illud nobis tantummodo est reliquum, ut sanctæ ab illo adæ vitæ memoria luctum ac mœrorem nostrum leniamus. Atque hoc de illius laudibus dicendi impositum mihi munus facile quidem sustinerem, neque ipsa me rerum dignitas ac copia deterreret, si optimi Principis in me meritorum magnitudini parem orationem invenire possem. Nunc ea ipsa, quæ ad dicendum amplissima essent, me magis impediunt ac perturbant, & nescio quomodo ingenii mei tenuitatem non tam excitari sentio officii recordatione, quam vi doloris opprimi atque extinguui. Sed vestræ benignitatis spe recreor ac reficior EE. PP. Vosque obsecro, ut me in sustinendo gravissimo munere auctoritate vestra suscepto, humanitate item vestra sublevetis, atque eximias illius laudes vobis optime cognitæ ac perspectas, quæ neque fatis ornate neque magnifice pro earumdem præstantia referri a me possunt, vos ipsi vobis animo & cogitatione vestra subiiciatis.

At-

Atque utinam ab omni rerum serie atque ordine percensendo angustis temporis minime excluderetur oratio, ipsa illa certe ingenii ac naturæ initia ad excellentem quandam sanctitatem inchoata, ac primi CLEMENTIS ad rempublicam aditus, atque alii deinde in amplissimorum munerum perfunditione suscepti cursus satis indicarent jam tum informari atque instrui cœptam esse illam innocentiae integritatis ac virtutis speciem, quæ deinde esset omnium oculos ad sui admirationem conversura. Verum cum pro incredibili rerum copia nequaquam possim omnia dicendo persequi, ad illa continuo me conferam, quæ reipublicæ utilitate clarissima sunt, & ipsa imperii magnitudine ac dignitate omnem humanarum rerum conditionem prætergressa esse videri possint. Quid enim aliud quæso summi in Christiana republica Principatus nomine, quid maximi Sacrorum Antistitis munere continetur, quam divinum ac immensum quiddam? illum nimirum, qui eo loco sit positus, Deum inter atque homines sequestrum esse, divinis humana conjungere, sui regni fines iisdem esse cæli ac inferorum terminis descriptos, legum ac sanctionum eam vim esse, quæ non solum ad civium actiones dirigendas, sed ad mentes etiam inflectendas, atque ad pertractandos intimos animorum recessus permanet, ac morum sanctitate atque exemplis omnium animos ad virtutem ac Dei ipsius similitudinem traducat. Ad hanc tantam rerum amplitudinem cum se divinitus evocari CLEMENS agnosceret, quamquam vehementissime commotus ac perturbatus. tamen magno se atque erecto oportere esse animo judicavit; cum a quo sibi tanti imperii procurationem esse traditam videret, eundem se adiutorem, comitem, ac ducem habiturum confideret. Verum non aliam certiore comparandi sibi illius præsidii rationem esse vidit, quam si religionis, cujus faciem præferret, vim etiam, quæ in Deo colendo diligendoque omnis est posita, in se ipse potissimum exprimeret, facta & consilia omnia ad illius voluntatem aggregaret, illius auctoritate niteretur, dictis fidem adjungeret, illi uni tota mentis consensione, atque amore adhærere. Itaque novo quodam atque inusitato ardore, ac ejus consecrandi propositi, quod illius animo jampridem infederat, incredibili cupiditate incensus continuo ad hunc bonorum ac virtutum omnium fontem cogitationem, spem, studium, ac desiderium omne convertit: ab hoc omni cultu, obsequiis omnibus demerendo nunquam divelli, ad hunc unum laboribus defatigatus confugere, in eoque pietatis usu libentissime conquiescere, in rebus agendis ejus consilia exquirere, una illius fiducia recreari, ejus præsidio ac tutela se suaque omnia permittere. Neque vero hic tantus pietatis ardor latebris animi delitescere ac contineri poterat, quin ad omnium etiam sensus emanaret, quin ore vultu oculis emicaret, ac erumperet. Recordamini quæso illos animi motus, quibus ipsum excitari in templis adeundis, illas oris inflammationes, quibus in sacris faciendis incendi videbamus, cum illum & loci majestas & populi frequentia & nostræ utilitatis opportunitas vehementissime commoveret. Ac sane quid ad religionis speciem augustius esse potest, quid in humanis rebus magnificentius, quam hos publicos pietatis conventus agi coram ipso omnis sanctitatis Auctore Deo? quæ in re magis quam in hujusmodi celebritate elucere & tanquam in theatro spectari maximi Sacrorum Præsidis virtus? Facile quidem omnes tantæ rei magnitudinem atque utilitatem perspicerent, si tum Deum ipsum ab illo evocatum atque immensa ac immortalis luce circumfusi in aris tamquam in solio palam confidentem viderent, si illius vota atque obsecrationes libentissime excipientem, atque ejus pro populi incolumitate advocacy acceptissimam ipsi esse conspicerent; quis non suam, non omnium rem tum agi maxime crederet, atque in hoc pietatis munere non assidue illum versari, non præcipuas illius partes sitas esse vellet? Sed num oculorum præsidii indigemus, ut certiora nobis esse possint, quæ divinæ auctoritatis robore sunt firmissima? Num ullæ sunt rerum imagines tam acres tam valide ad quempiam

piam commovendum, quam intimos Optimi Principis sensus divini testimonii gravitate subnixos præsentis Dei vis ac majestas occupabat? Quare quid mirum, si hoc religionis studio tantopere exardesceret, & divinæ consuetudinis ac familiaritatis cupiditate maxime traheretur, si, quem curandis Ecclesiæ commodis utilissimum videret, idem pietatis usus esset illi jucundissimus? Itaque hoc unum illi curarum erat perfugium, hoc ægritudinum suavissimum solatium. Hinc nullis rerum impedimentis ab hac divinæ consuetudinis constantia disjungi unquam est passus. Hinc in illius contemplatione diutissime in hærentem, in illo defixum, cum illo colloquentem quotidie vidimus. Atque ab hujusmodi quidem cum Deo tanquam colloquiis ac congressionibus incredibile illud divini cultus promovendi studium afferebat, inde ille ardor religionis caste pieque tuendæ, & sanctissimis exemplis ac præceptis muniendæ, inde illa mirifica populi doctrinæ ac morum institutione imbuendi cura, inde illi optatissimi tanquam triumphi fuerunt, cum excellentium sanctitatis virorum & memoriarum solemnibus cæremoniis consecraret, & vitam ad imitandum proponeret. In cæteris etiam administrandæ reipublicæ partibus eodem se præsidio erigebat. Sed quo firmiore adjumento fideret, eo se alacriorem in rebus gerendis oportere esse arbitrabatur. Neque enim in inerti spe conquiescendum, neque ad otium se vocatum, sed ad laborem esse noverat; proinde neque ætatis neque valetudinis incommodis ab agendo est unquam revocatus; nullam diligentiam nimiam esse duxit pro religionis ac reipublicæ commodis susceptam. Verum postquam omnem industriam, omnem curam in tanto persequendo munere contulisset, vanam atque inanem operam ac solertiam esse duxit, quæ non esset cum divini præsidii fiducia conjuncta, atque ad illius consilii rationes accommodata. Non expediendi negotii difficultas, non prosperi aut adversi rerum casus ab hac divinæ voluntatis ac gloriæ consecrandæ constantia divellere illum unquam potuerunt. Hoc religioni, hoc reipublicæ, hoc sibi, hoc omnibus utile esse ajebat, quod divino nutu ac numine fieret, hos esse præclaros, hos expectandos rerum successus; neque desiderio atque opinione nostra, sed illius tantummodo voluntate, illius gloria veras ac solidas utilitates esse metiendas. Difficile professio est in ipso negotiorum æstu, cum omnem operam omnem animi contentiorem ad optatissimos rerum consequendos exitus converteris, deinde neque ullo studio neque ipsius publicæ utilitatis curandæ cupiditate auferri atque abripi, ad omnes rerum eventus æque paratum esse, neque si ex animo precefferint, efferri, sibi que arrogare ac tribuere quidpiam, neque, si minus ex sententia acciderint, vehementius perturbari ac deijci. Sed cujus animum altissime pervaserit illa infinitæ sapientissimæque Mentis magnitudo, quique una humani consilii imbecillitatem perspexerit, idem facile omnem judicandi temeritatem abiciet, ac illius plane voluntati congruet ac consentiet. Cum illa enim summa atque excellentente natura se ac reliqua omnia comparans, quam continuo deprimi cuncta, & quæ reputantur maxima, evanescere ac dilabi animadvertet, quam se ipse contemnet, quam omnem de se gloriandi sui que diligendi sensum deferet! His initiis orta atque educata illa veræ laudis ac virtutum omnium altrix & magistra, his, inquam, initiis præclara illa Christianæ Humilitatis forma ac species effloruit. Major illa quidem est atque altior, quam ut illuc ulla possit humanæ solertiæ doctrinæque ratio pertingere. Proinde divinis Christi institutis atque exemplis fuit primum illius patefacta vis omnis nomenque perceptum. Quam ex hac disciplina semel hauritam cum penitus imbibisset, qua cura CLEMENS in ejusdem est artibus assidue versatus, quam amplis fuit illius doctrinæ incrementis in dies auctior? Ex ipsis honorum accessionibus hæc demissoris animi in eo studia mire creverant. In summo dominationis gradu, in quo ipse dignitatis splendor facile perstringit oculos, & quisque ad casum ac prolap-
sionem eo est proclivior, quo magis ad illam de se plus æquo sentiendi inclinatio-

nem

nem aliorum etiam assentationes incumbunt, quam longe ab hujusmodi blandis vocibus abhorrentem atque eximiae virtutis cupiditate vehementius conflagrantem admirati sumus? Quanquam in rebus persequendis & in ingeniis hominum cognoscendis animi sagacitatem, restique ac veri singularem intelligentiam in illo omnes agnoscerent, tamen sibi uni nunquam satisfacere poterat; tum suae tantum industriae minus illum poenitebat, cum nihil sibi assumeret, cum omnes opera ac solertiae suae partes ad Deum cuncta referendi studio cumularet. Verum illud praclare usuvenire vidimus, ut ex hac ipsa demissioris animi alacritate, tanquam ex altissimis radicibus uberior in ipso ceterarum virtutum splendor eniteret, atque illa omnis honestatis cognatio, ille pulcherrimus omnis laudis consensus ac concentus oriretur. Qui enim alii praestantiores verae sapientiae, ac iustitiae ortus ac progressiones esse possunt? Quis melius earum vim unquam assequetur, quam qui Deum unum Optimum Maximum esse, cetera omnia angusta atque imbecilla perviderit? Ubi magis adolescere ac perfici illa vitae moderatrix, illa viduix cupiditatum ac perturbationum virtus poterit, quam illius animo, quem nullus a Dei conjunctione neque laetitia neque aegritudinis motus divellat? Hoc ipse virtutum ornatu instructus egregium illum, & quo nihil homini in vita est jucundius, pacis ac tranquillitatis fructum est consecutus. Nam quemadmodum angores ac aegritudines assidui sunt sceleris ac turpitudinis comites, ita quietis & securitatis jucunditas virtutem ac sanctitatem constantissime consecantur. Hinc ejus animus minime corporis angustiis impeditus ad precipiendam beatam illius ac coelestis vitae suavitatem rapi atque avocari videbatur. In divina pulchritudine contemplanda assidue defixum, in illam intentum, ad illius speciem sese effingentem, illius in se similitudinem exprimentem, fieri non poterat, quin rivus aliquis infinitae voluptatis, cujus plenissimus haustus caelestis illius patriae cives beatissimos efficit, ipsum etiam circumfluere ac perfunderet. O praecelam virtutis ac sanctitatis conditionem, quae hujus etiam vitae tenebras aliquo inextinctae illius lucis radio collustrat, quae ab hac rerum contagione sejungit animum, atque ad divinae quodammodo naturae societatem traducit. Sed quo me tantarum ac tam sublimium virtutum admiratione abreptum esse video, quarum neque animo sustinere magnitudinem possum, neque oratione persequi? Itaque ad alias potius me convertam ab iisdem certe initiis deductas, sed faciliores, nobisque quodammodo chariores laudes aequitatis, clementiae, liberalitatis. Illas quidem magnopere suspicimus ac admiramur, has amamus, in hisque libentius conquiescimus. Suavioribus hisce virtutibus ornatum nobiscum versari, & qui dignitate longissime a nobis recederet, humanitate ad nos accedere, nobisque conjungi laetabamur. Nihil in eo arrogans, nihil elatum, numquam majestas imperii naturae morumque lenitati adversata est; non auctoritas, non dignitas a suavitate ingenii revocavit. Magna quidem naturae vis ad facilitatem ac mansuetudinem esse potest; sed quae tanta ingenii lenitas est, quae nulla unquam aut importunitate, aut offensione vincatur? Hanc CLEMENS optimam naturae informationem uno Christi exemplo ac divinae illius imitandae mansuetudinis studio confirmavit. In illum intuens nulla potuit animi acerbitate incitari, nullo iracundiae motu concuti. Faciles ad illum omnibus erant aditus; ea sermonis comitas ac benignitas, ut quisque aperte intelligeret non mediocre in illum & ex alienis malis molestiae partem, & ex bonis redundare voluptatis. In ipsa regnandi conditione illud erat jucundissimum, quod inde ceteros juvandi ac beneficiis complectendi maxima esset opportunitas. Hoc omnes imperii labores & curas satis mitigabat, hoc maximam illi sollicitudinum partem adimebat. Permultum quidem interest, quomodo quisque affectus in his etiam officiis versetur, unde uberrimae liberalitatis laudes consequuntur. Quam multa enim, quae & liberaliter & magnifice gesta esse praedicantur, quae populorum commodo & civitatum

ornamento sint, quorum firmissimis monumentis consignata nominis immortalitas videri possit, tamen ipsa ambitione ac famæ cupiditate misere corrumpuntur. Siquidem neque ab hominum commendatione, neque ab ullis rebus extra nos positis, sed a bene constituto animo, & ab eo, quem in agendo spectamus, bonorum ine, omnis certe factorum consiliorumque præstantia profiscitur. Qui cæterarum virtutum, idem liberalitatis est ortus, & quod a divinæ gloriæ fontibus ad civitatem etiam decora & commoda derivatur, id revera magnificum est, id liberale, id gloriosum. Multa profectio in hoc genere egregie ac splendide a CLEMENTE gesta commemorari a me possunt. Amplissima ad dicendum essent tot publicæ Urbis ædificia restituta atque ornata, portuum constructiones, derivationes fluminum, exquisitissima vetustatis monumenta comparata. Sed finite, ut ad eas liberalitatis partes potissimum me conferam, in quibus nihil caducum, nihil fluxum, nihil fragile inesse potest, quæ nulla animi levitate, nulla famæ suspicione depravantur. Harum ratio a christianæ charitatis tracta legibus in indigentium sublevandis calamitatibus tota versatur. Hujus ille virtutis splendore mature delectatus abuti divino beneficio sibi videbatur, nisi perampli patrimonii copias, quibus in opulentissima ac nobilissima domo erat instructus, ad egentium usus traduceret. Quanta aliorum studia in comparandis colligendisque divitiis esse solent, tanta illius erat alacritas in largiendis. Divini consilii rationes, quibus pauperum calamitatibus esset cautum ac provisum, interverti censebat atque intercipi, si aut avaritia obstruerentur, aut ad fastum atque illecebras derivarentur, quæ ad aliorum levandam inopiam redundare oporteret. Proinde cum dignitatum accessionibus census æque auctiores esse intelligeret, mirifice gestiebat liberalitatis exercendæ sibi esse fines prorogatos. Quantum vero fuit in illo ardor, cum ad Patavinum Sacerdotium evectus novos sibi patefactos esse cursus, atque ampliora ad præclare de aliis merendum se natum esse spatia agnosceret? Jam ipsa liberalitatis consuetudine ad agendum paratior, atque inflammator hunc præstantissimum esse honoris sui fructum reputabat, quod illam etiam facultatem afferret, ut opera ipse sua ac industria præstantiores liberalitatis partes cumulare, & ad inopiæ adjumenta religionis etiam ac pietatis subsidia, quæ prima juvandi esset ratio, posset conjungere. Sed quonam alio in loco præclarius hoc charitatis specimen atque exemplar spectari potuit, quam in hoc summo religionis gradu? Quæ enim est ulla civitas tam certis ac tam propriis fixa & fundata legibus, quam est charitatis institutis hoc religionis stabilitum imperium, cujus omnis disciplina, omnis juris descriptio una charitatis sanctione comprehenditur? Atque hujus quidem legis vis ab ipso religionis Conditore profecta ad omnium societatem arctissimis benevolentia vinculis colligendam late delabitur; tamen in pauperum atque egentium sublevandis miseriis potissimum cernitur, quippe quæ nostræ ipsius in Deum pietatis atque amoris modum unâ eademque definat. Hujusmodi legis institutis cum cæteros omnes constrictos intelligeret, tum se potissimum teneri, ac tanquam acerrimis stimulis excitari sentiebat, ut imperii, cui præsideret, principem legem sua ipse opera, suo exemplo roboraret. Tunc a se præclare gestum imperium existimabar, cum miserorum vindicis ac pauperum parentis esset officio perfunctus; humanis quidem civitatum legibus incolunitati ac commodis civium æqua juris descriptione satis esse consultum; solos eos deferi, eorum miseriis minime caveri; proinde charitatis id esse legibus farsciendum, ultro eorum malis occurrendum, ultro fortunæ iniquitatem, quibus fieri præsidii, amovendam. Quamobrem omnem in eo industriam posuit, ut qui maxime opis indigerent, sedulo conquireret, ac eorum malis mederetur. Jucundissimum sedulitatis præmium percipiebat, cum orbitati solatium, pudicitia tutelam, perfugium miseris, egestati præsidium comparatum a se esse intelligeret. Si aliquando vero temporum asperitate fieret, ut pauperum

cala-

(VIII.)

calamitates exaggerari animadverteret, tum vero (quæ charitatis est indoles, ut pro calamitatum magnitudine magis se ipsa acuat atque incitet) ille acerrimis pietatis ac misericordiæ studiis inflammari. Atque hic mihi sese objicit luctuosissimum illud tempus, cum ingravescente per universam pene Italiam annonæ difficultate, atque ex agris sterilitate desertis ac vastatis innumerabili undique confluente multitudine fame fere enecta, viisque omnibus abjecta ac prostrata, de nostra ac totius Urbis incolumitate magnopere timeremus. In hoc misero rerum statu recordamini, qua cura, qua sollicitudine optimi Principis animus premeretur, quam omnium luctus ac calamitates in illum unum maxime concurrerent ac incumberent. Quam effusum illius gemitus fuerunt, quo ardore, qua fiducia ad Deum confugere, ab eo subsidia expetere ac expectare videbamus! In hoc tam gravi rerum discrimine tantæ liberalitatis, & charitatis species non mediocrem & malis allevationem attulit, & ad virtutem imitandam mirifica in omnibus studia excitavit. Ac Vos potissimum incredibile illud charitatis exemplar æmulari singulari elacritate in sublevandis miserorum ærumnis adfuitis; cumque idem ardor ad reliquorum civium imitationem emanasset. Deum ipsum hoc eximio christianæ charitatis spectaculo delectatum, & illius obsecrationibus permotum, periculo tandem ac malis finem attulisse lætati sumus.

Sed quid ea diutius commemorem, quæ vos ipsi, qui illius actionum testes atque adiutores fuistis, melius animo recognoscere ac recensere potestis, quam ego dicendo consequi? Ant quid ea verbis eleveam atque imminuam, quorum meliorem ego quidem commendationem hoc ipso populi luctu nullam esse existimo? Quid enim omnium bonorum desiderium, quid pauperum gemitus, quid universæ civitatis mœror, quid hic quotidianus infinitæ multitudinis concursus aliud præferat, quam clarissimum illius excellentis virtutis testimonium? Dum memoria repetunt illam pietatem, moderationem, æquitatem, commovetur ac excitatur in omnium animis species ac similitudo quædam antiquæ illius innocentæ ac integritatis, quando istæ præclaræ virtutes non solum hominum, sed & temporum propriæ esse videbantur. Atque hæc quidem pietatis ac sanctitatis laudes fortasse minus amplæ atque illustres iis videri possunt siqui virtutem ostentatione gloriæ, rerum fastu, ac pompæ magnificentia metiantur. Nulla hic hujusmodi cupiditatis vestigia, nulla victoriæ monumenta, nullus trophæis ac triumphis locus, nihil opibus, nihil copiis, nihil equitatus robore peractum. Sed immensum quiddam infinitumque interest, inter illam judiciorum pravitatem, ac sinceram atque incorruptam christianæ virtutis æstimandæ rationem; illa sensuum consuetudine ac opinionum inconstantia movetur, hæc veritatis vi & gravitate nititur; brevibus illa vitæ spatiis ac interituri nominis gloria præclare factorum præmia concludit, hæc æternitatis diuturnitate spes suas terminat, & sola summi boni mercede insuitam animorum cupiditatem explendam statuit. Ad hanc veri rectique normam dirigendus est omnis christianæ vitæ modus, ac recte factorum laudes revocandæ. Ad hanc unam nobis CLEMENTIS XIII. virtutes exigendæ. Quotiescumque enim hoc gravissimo iudicio omnem aetæ ab illo vitæ cursum expendemus, eximiam quamdam veræ solidæque virtutis ac sanctitatis formam inde existere videbimus, quæ & religionis Ducem ac Principem maxime deceat, & Deo acceptissima sit, & Ecclesiæ gloriosissima, & nobis ad imitandum utilissima.

FINIS.

